



وحشاني

وحشاني القومه
من بدري
وأروح الغيط
و اخطي قيود
ومدار طمبوشة البدري
والتوتة...
و سكة أبو قاعود
وحشني المشي
ع الترعة
وصوت المكنة
و الطومبيل
وناس تسقي
و ناس تزرع

ودا يحمل و دا بيشيل
وحشتني اللمة و القعدة
وقولة..خلي عنه...عواف
والضهر لما نتغدي
في ضلة شجرة
الصفصاف
وحشني كل
شئ في بلدنا
غيطان القمح
و البرسيم
ومقام الشيخ
علي والمدنة
وصلاة العصر

في ابن تميم
وحشوني الصحبة والأحباب
وحشتني اللّمة في الملعب
ولا فرقة ولا أحزاب
ويوماتي لعب للمغرب
وحشتني لمة العيله
علي فرشة و كام مسند
ولقمة جبنة وفطيرة
وحبة شاي على المنقد